



Election Commission-i BJP den senteper inyaker: Rahul Gandhi

Victoria Mboko-i Canada Open kokogo



Ujjwala Yojana 2025-26 atema Centre-i sen 12,000 crore agütsütsü

Kohima, Luroi/August 08 (TYO): Sorkari 2025-26 küm atema Pradhan Mantri Ujjwala Yojana consumers asoshi targeted subsidies maneni agütsütsü telemetba agizükogo, kong sen 12,000 crore dak tema indoktsü.

Ato Kilonser Narendra Modi lenisüba kübok Cabinet ajanga iba telemetba agiba osang tanü New Delhi nung osangbener den lemsatepba mapang, sorkari küm nung refills toku tashi atema

14.2 kilogram cylinder shia subsidy sen 300 agütsütsü, ta Information and Broadcasting Minister Ashwini Vaishnaw-i metetdaksü.

Maneni tesüiba ita 15 tsüngta jenjang tajemba nung LPG ayokba ajanga akosar aliba asoshi sorkar meyong totzü company asem - Indian Oil, Bharat Petroleum aser Hindustan Petroleum nem subsidy sen 30,000 crore agütsütsü Cabinet-i kasa senden nung agizükogo.

Yisemyong anasa 66kV transmission tower ka laoa lir



Mokokchung district kübok Yisemyong anasa August 8, 2025 nü alinen tuluka alua 66kV transmission tower ka laoba ajanga Tuli Sub-Division, Longleng aser Mon district power supply nung kongshia lir.

Dimapur, Luroi/August 08 (TYO): Yisemyong anasa August 8, 2025 nü 66kV Transmission Tower ka laoba ajanga Tuli Sub-Division, Longleng aser Mon district power supply nung kongshio, ta Executive Engineer, Transmission Division, Mokochung ajanga sangdong ka nung metetdaksü.

Iba tower ya anepdang 5:00 ako meta lao aser line patrolling senzüba sülen nikongdang 4:00 ako meta timtem puteta liasü.

Iba transmission tower ya alinen tulu aluba ajanga lao, ta sangdong ajanga ashi.

Department-i tensa azüoktsü asoshi akokba lenmangtem ajunga amshia meranga inyaktar. Anungji onoki akok tashi tekeratiba nung iba timtem bentettsü merangdang Tuli Sub-Division, Longleng aser Mon district nung consumer tem dang timtem arema atatsü ayongzüker, ta Department sangdong ajangasa ashi.

Nagaland Angh tetsüing surgery agi, tang tajungba lir

Dimapur, Luroi/August 08 (TYO): Nagaland Ang La Ganesan tetsüing nung minor surgery ka agia tang Chennai nung temang anepaluba mapang lir, ta osang ka ajanga ashir.

Iba surgery ya tan hopta agi aser pa temang tajungba lir ta angazüker. Pa kanga junga taneptsü ngutar aser taruba hopta tashinung Nagaland-i meyipa shilanga pa mapa maneni inyaksü imlar, ta osang

ajanga ashi. Kasa mapang Nagaland Chief Minister Dr. Neiphiu Rio-ia social media sapang X nung, Nagaland nung aliba nüburtem tenüing nung Angh tekeraba nung taneptsü ngudakjang ta sarasademsür, ta shia liasü.

"Tashi itshia aser tekeraba nung nü mapa dangi meyipa maneni shisatsü tajung agi state anitsü asoshi onoki sarasademsür," ta CM Rio-i zülua liasü.

Nagaland nütsüing yongsük züingdangba census 2027 nung agitsü



Dr. Zasekuolie Chusi IAS, Director of Census Operations, Nagaland aser Shri. Sentianger Imchen IAS, Chief Secretary, Nagaland.

Dimapur, Luroi/August 08 (TYO): Nagaland nütsüing yongsük züingdangba census shilem ana lemsar 2027 nung agitsü, koba ajak agi 16 buba asütsü aser India nüchiso ngur 8 buba alitsü.

Mezüing shilem dang 'house listing operation' ta ajar, koba 2026 küm April aser September ita tsüngta agitsü aser tanabuba shilem dang 'population enumeration' ta ajar aser ibai rerjep aliba tesemtem dak alaka linük tesem ajunga nung February 2027 nung agitsü.

Iba osang ya Director of Census Operation, Nagaland, Dr. Zasekuolie Chusi-i August 7, 2025 nü Nagaland Chief Secretary, Sentianger Imchen, IAS den senden ka amendang lemsatepa liasü.

Director den Department nungi ketdangsür temi state nung bureaucratic post tematiba jenjang tongtetba asoshi Sentianger Imchen nem tenüsang agütsü aser iba census nung pa teyari nüingdaksü ta shia liasü.

2027 census ya digital census mezüingbuba asütsü aser yangi enumerators temi field work mapang mobile phones amshia osang bendentsü aser nüburtemi pei sasa tenüing zülüoktsü asoshi 'self-enumeration' alitsü, aser iba ya census operations nung mezüing amshir alitsü, ta Director Chusi-i ashi.

Linük nung January 1, 2026 nungi 'jurisdictional changes' ajunga soita ayutsü, anungji 2027 census ya December 31, 2025 tashinung aliba jurisdiction nung

ajemdaker agitsü, ta pai ashi.

Census ya union map aka süaka inyakyim ya state machinery ajanga inyaksü aser district sasep nung deputy commissioner tem principal census officers asütsü aser administrative officers tem charge officers ama alitsü aser tesayurtem rongnungi supervisors aser enumerators tem shimtsü, ta ashi.

Taoba mapang census alidang enumerators dang pei lezmüktsüba tesem indang 'free-hand notional map' yangludaksü, saka 2027 census nungbo enumerators temi geo-referenced digital layout map amshitsü aser ki o jen ajunga geo-tagged asütsü.

District ka nung mapang tatsüka tsüngta pre-test alitsü aser iba mapang jila aser yimtsüngtem ajak awajemtsü. Ibai shidakba census asoshi tendanger amai alitsü, kong census ketdangsür shimba, training, field work aser honorarium agütsüba ajak alitsü, ta ashi.

Pre-test atema network coverage maliba mesüra senzüsempongba nung timtem kanga aliba district ka shimtsü tebilemba lir.

Kasa senden nung Mhathung Rangthang, Assistant Director ajanga census inyakyim indang PowerPoint presentation ka agüja liasü.

PHED-i 'Har Ghar Tiranga, Har Ghar Swachhta' campaign tenzükogo



PHED Directorate, Kohima nung August 8, 2025 nü "Har Ghar Tiranga, Har Ghar Swachhta" campaign tenzükba mapang tangokba noksa ka nung PHED Nagaland ketdangsür aser dangartem angur.

Dimapur, Luroi/August 08 (TYO): Swachh Bharat Mission (Grameen) aser Jal Jeevan Mission (JJM) kübok Public Health Engineering Department (PHED), Government of Nagaland ajanga August 8, 2025 nü PHED Directorate, Kohima nung "Har Ghar Tiranga, Har Ghar Swachhta" campaign tenzükogo.

Iba sentong nung Er. Martemsu T Imchen, SDO PHED menden liasü aser Er. Gwatilo Tep, Addl. Chief

Engineer and MD, WSSO PHED ajanga iba Campaign nükjidong lemsatepa liasü. "Har Ghar Tiranga, Har Ghar Swachhta" mesayadang Er. L Layang Khiamniungan, Chief Engineer PHED ajanga Laishiba tekong nungi onük bener arua mürekmejutsü, pei aliba tesem aser pei temang müreka ayutsü indang jemba liasü.

Chief Engineer-i anir iba sentong nung shilem agirtem Swachhata pledge agia "Har Ghar

Tiranga, Har Ghar Swachhta" semzüktsü.

Sentong tembanga Lhousokono Zinyü, Sanitation & Hygiene Consultant, WSSO PHED ajanga melepzüng o jemba aser iba sülen parnoki Government Middle School, Phezoucha Kohima semdanga 'Swachhata talks' ayongzüka kaketshir nem 'water quality monitoring' aser tzü kumzüka ayutsü asoshi shisatsü lemsatepa liasü.

'Development of Education in North Eastern India' dak sendakba nung exhibition ka agi



Dimapur, Luroi/August 8 (TYO): National Archives of India aser Higher Education Department, Nagaland na longjemmer August 8 nü Capital Convention Centre, Kohima nung 'Development of Education in North Eastern India' dak sendakba nung exhibition ka ayongzüka agiogo.

Sentong nung o jembiba mapang Minister of Higher Education and Tourism, Temjen Imna Along-i, iba sentong ayongzüka agiba ya Nagaland atema otsüsütsüka aser state nung iba exhibition ayongzüka agiba ya koda tongtibang iba indang lemsatep. Paisa, NE nung shisalayim kanga renloka aoba ya tenüng asangtsü langla lir, ta ashi. Pai ashiba agi, Nagaland nung kin aika lir aser asen tetsü tebou nung libaliro tazüokba nung ali aser shisatsü agi sünger liasü, koba mangaoka ayutsü nüngdaker.

Naga nung zülujang maliba indang jembiba mapang pai, tezüluba nung tatalokbatem mangaoka yua meliaka asen lokti talangka aruogo, koba sobaliba, inyakyim aser libaliro kanga junga wazüka ayuba kuli lir, ta ashi. Paisa, archiving koda tongtibang iba indang

lemsatepba den lokti ka sobaliba aser puti otsü wazüka aser mangaoka ayutsü atema Archives yagi kanga tongtibang shilem agir, ta ashi.

Maneni Minister-i, Naga, limai shisalayim bener arutsütsü atema Christian missionary temi taküm bendanga agüja inyakba atema parnok nem tenüngsang agütsü. Pai, sentong nung shilem agia aliba kaketshirtem dang alima terenlok den sütepa aintsü ajungshi. Tatem nung pai, kaketshisatsü peria bener aliba nisung kaji mapa inyaksü tetemsü saka ajaki peisasa lenmang bushia meranga inyakba dak dang keta lir ta ashi.

Sentong nungsa MLA, Dr. Tseilhoutuo Rhutso-i, Nagaland nung exhibition ayongzüka katsüba atema Director General of the National Archives of India dang kanga pelaba lemsatep. Pai, iba sentong ya tenük lapoker ka ama lir ta shia state indang takar sobaliba aser puti otsü mangaoka ayutsü nüngdakba lemastepa liasü. Paisa, Ministry of Culture ajanga National Archives of India dang Nagaland nung Archives

Centre ka amenoktsü mepeshia liasü.

Director General of the National Archives of India, Samar Nanda-i o jembiba mapang, sobaliba wazüka ayubaji tarutsü angatetsü aser yanglutsü atema kanga tongtibang lir. Pai ashiba agi, iba exhibition ajanga North East India nung shisalayim renloka aoba aser talisa Nagaland nung terenlok indang metetdaksür.

Maneni Nanda-i, tarutsü nung North East aser talisa Nagaland nung Vikshit Bharat nukla den putepa shisatsü balala angazükdak rijutem tali adokyonga aotsü imla ataba lemsatep.

Minister for Higher Education and Tourism, Temjen Imna Along-i iba exhibition ya lapoktsü. Paisa, Digital Exhibition aser brochure amenokja liasü.

Iba exhibition ya kuli kakat balala aser shisashirtem kuli balala ajanga Northeast nung shisalayim puti otsü sayutsü nükjidong nung ayongzüka agidar.

Exhibition ya August 8 nungi 15 tashi Capital Convention Centre, Kohima nung agitsü.

Ex-PAN aser Advisor Imkong nungeri asükhu lemsatep

Dimapur, Luroi/August 8 (TYO): Ex-Parliamentarians Association of Nagaland (Ex-PAN)-i, külem züngsem Nüngsangyapang ajungbena Mokokchung nung August 8 nü asüba osang angazüka mang ayimba lemsatepogo.

Asür Nüngsangyapang ya 2013 küm nungi tasünü tashi ExPAN züngsem ka liasü, aser pa asüba ya Ex-PAN kibong asoshi takoksa tulu lir.

2003 nungi 2013 tashi Nagaland Legislative Assembly nung züngsem ka ama pei nüburtem atema nokdakba mapang asür Nüngsangyapang-i, 23rd Impur Assembly Constituency nung aliba nüburtem, Aoer tem aser Naga nungertem ajungkettsü atema anibelem mesasai meranga inyakogo. Pa asüba ya Aoer asoshi dang masü saka Naga nung aser ajak atema takoksa tulu lir. Ex-PAN-i asür kinunertem

den asüku lemsateper aser tulusang Tsüngremi parnok nem mangyimjashi koktettsü atema tashi aser anisüngzüka agüjang ta sarasademtsür. Asür tanüla teti tatem makdak anisüngzükdakjang, ta tir Joshua Sumi aser General Secretary Tarie Zeliang nati külem sangdong ka ajanga metetdaksü.

Kasa mapang nung Advisor & MLA Imkong L Imcheni-ia Nungsangyapang asüba osang angazüka asükhu lemsatepogo.

"Medemer tajung Nungsangyapang - Küdila Yapang - lanuwa nungi medema arur, Nagaland Assembly tashi külemi inyaktepa arur, tanüp medemer tajung Yapangba iba akümüli mapang temer asen Teyanglur Tsungrem den alitsu apusoa ogo ta angashir temulung kanga aria bilemogo," ta Advisor Imkongi ashi.

Asür Nungsangyapang ya

lenier tajung ka dang masü saka ochishir, lokti aser yimden tenzüknüba sempet tajung aketba tanishir tajung ka liasu. Pa Mopungchuket senso tajung aser asen AO kin atema dang masü, saka Naga kin lenier tajung ka liasu. Pa Socio-Political leader dang masü ano Nagaland nung footballer tajung rongnung ka liasü, oda sempet tajung aketba lenier sotetba liasu, ta paisa shisem.

Tanü pa iba akümüli toktsür oadokyonga, pa shisatsü aser mapa tajungtem agi asen akümlir den teti jembitsü.

"Medemer taru küdi Yapang, Meyutsungba kima ko, nang tenüng süba te jadango, Oh, ni Wapong Nungsangyapang, Mopungchuket yimtiwapong, AO Naga Walunier teburchi arur ta sangma noh !!! Kudi Salemo ni," ta shia Advisor Imkongi asükhu lemsatepa liasü.

Mokokchung DC-i metetdaksür

Dimapur, Luroi/August 8 (TYO): Mokokchung Deputy Commissioner Ajit Kumar Verma IAS-i sangdong ka ajanga, Mokokchung District kübok office tekolak ajak dang 79buba Independence Day anogomung sentong ya anepdang 8:40 ako nungi Imkongmeren Sports Complex, Mokokchung nung

tenzüksü ta metetdaksüogo. Anungji ajak dang iba sentong nung tamakok maludaksüi arua shilem agitsü mepeshiba den sorkar tenzükertem ajak attendance agitsüm, ta

metetdaksü.

Ketdangsürtem shirnoksa leave makai sentong nung shilem magiba metetdir parnok Service Rules dak ajemdaker merenshitsü.

Anungji office tekolak ajak dang pei office nung staff ajak nem iba osang agütsütsü aser pei department atema sentong tembangba sülen Rostrum tesülen attendance in-charge nungi attendance sheet meshia renemer agütsütsü tetuyuba agütsüogo, koba maneni jenjang tapet agitsü atema sorkar dangi abentsü.

Urban Local Bodies & Nagaland Village Councils senden ayonger

Dimapur, Luroi/August 8 (TYO): Advisor aser Committee on Urban Local Bodies & Nagaland Village Councils mendenbuba K. Tokugha Sukhalu-i sangdong ka ajanga committee senden ka Agusut 19 nü 11 ako nungi

tenzüka Assembly Secretariat, Kohima kübok C. Chongshen Committee Room nung amentsü ta metetdaksüogo.

Committee züngsem ajak dang iba senden nung tamakok maludaksüi arua shilem agitsü mepeshia metetdaksüogo.

Tuensang nung ADIP & RVY Assessment camp tem agi



Dimapur, Luroi/August 8 (TYO): Persons with Disabilities (PwDs) aser tientet rogotem nem angati assistive devices, wheelchair, hearing aids tem agütsütsü atema August 4 nungi 7 tsüngda Tuensang District kübok Noksen, Chare, Longkhim aser Sangsangnyu block nung ADIP & RVY Assessment Camp tem ayongzüka agiogo.

Iba camp ya Chief Medical Officer Tuensang, Artificial Limbs Manufacturing Corporations of India (ALIMCI) Kanpur aser DWO Tuensang nungeri ayongzüka agi aser District hospital Tuensang, PHC Noksen, Chare,

CHC Longkhim aser UPHC Tuensang nungeri teyari agüja liasü.

Kasa mapang nung CMO Tuensang, Dr. Imlitemsu Ozukum-i, Disability asadangba aser PwDs tem nem kuli kakat agütsüba inyakyim achaayanga agi.

Maneni PwD tem nem UDID Cards agütsü aser PwD tem temeden aser parnok nem tajangzüka balala agütsüba indang tangazükba agüja liasü. Ajak senteper anogo 4 camp ayongzüka agiba mapang nisung 1120 (ADIP-291 & RVY-829) asadang aser nisung 291 nem Disability Certificates aser UDID Card agüja liasü.

Tuensang nung "SAATHI campaign" ayongzüka agi

Dimapur, Luroi/August 8 (TYO): National Legal Services Authority (NALSA) tawabangba kübok Aadhaar Enrolment (UIDAI) District Administration, District Education office, Department of Economics & Statistics, Chief Medical office aser District Social Welfare Department Tuensang den longjemmer District Legal Services Authority-i achaayanga August 7 nü Tuensang Town Hall nung "SAATHI campaign" ayonzüka

agiogo.

Angati legal service camp ya arishi küm 18 tekübok aliba tanurtem shirnok kanga sensaker lir parnok nem temzüng ozüng kübok maitsü aser teyari agütsütsü, Aadhaar nung züngoksemtsütsü aser birth certificate agütsütsü nükjidong nung ayongzüka agiogo.

Ajak senteper birth certificates 27 agütsüba den Aadhaar nung nisung 36 züngoksemtsü aser affidavits 60 file sütsüogo.

Election Commission-i BJP den senteper inyaker: Rahul Gandhi



August 08, 2025 nü Freedom Park, Bengaluru nung 'Our Vote, Our Right, Our Fight' rally nung Congress Tir Mallikarjun Kharge, Lok Sabha nung opposition lenir Rahul Gandhi, Karnataka Chief Minister Siddaramaiah, Deputy Chief Minister D.K. Shivakumar aser AICC General Secretaries K.C. Venugopal aser Randeep Singh Surjewala nunger tangokba noksa nung angur.

Bengaluru, August 08 (Agencies): Hokolbarnü Lok Sabha nung Leader of Opposition (LoP), Rahul Gandhi-i Election Commission of India (ECI) aija tesüiba küm 10 indang electronic voters' lists den video recordings agüjang, ta takhangba agütsü. Election Commission-i ibaji magizükra parnoki ozüng alema inyakba mimshir asütsü aser election dak sendakba ashikülak nung shilem agir asütsü, ta pai metetdaksü. Bengaluru nung ayongzükba 'Our Vote, Our Right, Our Fight' rally nung jembidang Rahul Gandhi-i, ECI-i BJP den senteper inyaker, ta aitsü. "Election Commission-i ya

angatettsüla, Lok Sabha menden ka nung ochimashi jungkai adoktsütsü atema parnoki ita trok agi. Nenoki iba osangji magütsüra onoki ano Lok Sabha menden 15 nungi 20 tashi nung ochimashi jungkai adoktsütsü. Onok ket nung item osangji lir. Nenoki atsüksü mesüra ajentsü makok. Kenübo nenoki Opposition ajurutsü. Ketdangser aser Commission-i ibaji metettsüla," ta paisa ashi. Paisa, "Karnataka nung Lok Sabha menden ka result nung ochimashi liasü, aser ibaji state nüburtem anema inyakba lir. State sorkari ibaji bushisüngdangtsüla aser taila voter 1000 nungi 15,000 tashi tenzüng züluokba nung

aibelener ECI officials nem temerenshi agütsütsüla. Mahadevapura Assembly segment indang ochiji jungkai adoktsüla," ta metetdaksü. Paisa, "India nunger voters indang electronic data ji kanga tongtibang kuli lir. Kari danga ibaji raksatsüra ibaji kuli raksatsüba lir aser temerenshi agütsütsü temsüa aliba aibelen ka lir," ta metetdaksü. Congress lenirisa, "Linük indang electronic data agütsüra ni, Ato kilonser Narendra Modi ya ashikülak lenmang ajanga Ato kilonser aküm, ta kuli sayutsü. ECI-i digital records aser video footage agütsütsü memelungba atema linük nüburtemi tasüngdangba akatsüla," ta metetdaksü.

Ato kilonser Modi-i phone ajanga Russia Tir Putin den jemb

New Delhi, Luroi/August 08 (Agencies): Hokolbarnü India National Security Adviser, Ajit Doval-i Russia Tir, Vladimir Putin ajurua senden amenba sülen Ato kilonser Narendra Modi-ia Putin den phone ajanga jembio, ta ketdangsertem osang ka ajanga metetdaksü. Phone ajanga jembidang Modi-i Putin dang taküm India nung ayongzükba India-Russia summit nung adentsü atema India-i arutsü jaokba den külemi Russia-Ukraine tsünga rara anentsü atema yimjung ken o jembitsü mepishi. Brihostibarnü Doval-i, taküm küm tatembanglen Putin-i India semdangtsü aser iba atemaji anogo lemtetdar, ta metetdakja liasü. India-i Russia nunger dang nungi maneni totzü alizüker aser Russia den tesendaktep tajung ayur, ta aija US Tir Donald Trump-i India nunger osettsüset nung saru shilem 50 atutsü sangdongba sülen anogo ishika lir Modi-i Putin den jembir. Phone ajanga jembidang Russia Tir Putin-i Ukraine nung

raraba indang tongmelang agi Modi den lemsatepa liasü. India ketdangsertemi sangdong ka ajanga, "Tir Putin-i osang lemsatepba atema pa dang pelaba lemsatepba den külemi Ato kilonseri Ukraine den rara anentsü atema yimjung ken o jembitsü ajungshi," ta metetdaksü. "Lenir anatisa linük ana

tsünga tesendaktep jenjang reprangshi aser India o Russia na tsünga Special & Privileged Strategic Partnership tajungba akümtsü atema jembio," ta kasa osang ajanga metetdaksü. Modi-i taküm küm tatembanglen India nung ayongzükba 23buba India-Russia Annual Summit nung adentsü atema Putin jaok.

MORARJI DESAI NATIONAL INSTITUTE OF YOGA

Ministry of Ayush , Government of India

68, Ashok Road, New Delhi-110001

Ph. 23730417-18, 23351099, Telefax:011-23711657

Email, Website. www.yogamdniv.nic.in

Morarji Desai National Institute of Yoga (MDNIY) nung tsünglanglen agüja aliba mapa inyaksü asoshi temsüa aliba candidates nungi application meshir:

Sl. No.	Name of the Post	No. of Posts/Category	Pay Scale
1	Senior Medical Officer (SMO)	01 (UR)*	Level-11 (Rs. 67700-208700) + NPA

* Iba post asoshi shimba yimya - Direct Recruitment

Iba mapa inyaksü atema qualifications, experience aser danga terms & conditions amala osang tejangja Institute indang website www.yogamdniv.nic.in nung angutsü.

Nüngdakba qualifications, experience, etc. aliba tejangrar candidate temi shia aliba format nung application den pei sasa attested sür testimonials copy aser tawa tangokba passport tasazük noksa ana The Director, Morarji Desai National Institute of Yoga, 68-Ashok Road, New Delhi - 110001 dangi yoktsüla. MDNIY nung application Hard Copy ya All India National osangkaket tem nung iba Advertisement adoker anogo 45 tsünga agütsütsüla.

CBC 17213/12/0002/2526

ADMINISTRATIVE OFFICER

Air India lendong nung takoksa angur kibong 65-i Law Firm ka hire süogo

New Delhi, August 08 (Agencies): Taküm June 12 nü Ahmedabad yimti nung Air India tayimtsü tsükokba lendong nung takoksa angur kibong 65-i United States nung amenoka aliba law firm Beasley Allen hire süogo. Iba firm nung aviation attorney, Mike Andrews-i Hokolbarnü Ahmedabad kübok Meghaninagar area nung tayimtsü tsükokba tesem semdangogo aser Vadodara yimti nung takoksa angur kibonga kar ajuruogo. Tayimtsü tsükokba lendong nung takoksa angur kibong 65-i law firm hire süogo aser kibong teimbaka Gujarat aser Territory of Diu nungi lir; UK nung aliba kibong-a kar densema lir. Andrews-i, "Item kibongtem jagi tang bushisüngdangba ajanga bushitetbatem nung ajemdaker U.S. court nung ken o benoktsü akok. Item kibongtem jagi, atangji kechi atalok, komaser atalok, aser parnok atema kechi lenmangsa aliar metetner," ta metetdaksü. "Onoki tayimtsü tsükokba tesemji semdangogo aser yangji alir kar ajurua jembio. Onoki UK aser India naprongla nungi kibongtemji ajuruogo. Parnoki telangzüba aginer, inyakyim teladak südaksüner aser osang tejangja aginer," ta Andrews-i metetdaksü. Paisa India sorkar dang

tayimtsü nung aliba flight data recorder aser cockpit voice recorder ji agüjang, kechiyong ibaji ajanga lawyers aser mongintemi itemji asadanga inyaksangshitsü ta metetdaksüogo, ta osang angazüker. "Iba lendong atalokba ya Boeing ajanga lir ta bushitetra ken otemji US nung aliba Federal court nung benoktsü," ta Andrews-i metetdaksü. Osangbenertem den jembidang Andrews-i, "Asür pilot tem nem tai tongloksüba ya kanga bulua ataloker. Tanga tatalokbatem nung, tayimtsü nung timtem adokaka pilot temi tayimtsüji kanga junga anendaksütetra pilots nem tai metongloksür, kechiyong pilot tem jagi kuli shitettsü," ta metetdaksü. Andrews-isa Surat aser Diu na semdanga takoksa angur kibongtem ajurutsü aser Ahmedabad nunga takoksa angur kibongtem ajuruba sülen UK-i meyipa aotsü. June 12 nü Ahmedabad nungi Air India tayimtsü apusoba sülen minute ka majungdang Ahmedabad nung aliba medical hostel complex ka nung tsükoka liasü. Iba lendong nung tayimtsü nung mena alir 241 asü aser medical students pezü densema ali nung alir 19 asü.

FM Sitharaman-i Lok Sabha nung Income Tax Bill agienadokogo

New Delhi, August 08 (Agencies): Hokolbarnü Union Finance Minister, Nirmala Sitharaman-i Lok Sabha nung Income Tax bill, 2025 agienadokogo; Select Committee-i benokba onük kar inoksemba sülen bill tasenbaji benoktsü. Income Tax Bill tasenbaji August 11 nü Lok Sabha nung benoktsü. Osang angazükba agi, bill tasenba nungji Select Committee-i benokba onük ajak züngoktsü. Baijayant Panda-i aniba Select Committee nung züngsem 31 lir. Taküm February 13 nü Lok Sabha nung benokba Income Tax Bill nung onük aika

inoksemtsü atema Committee jagi benoka liasü. Committee jagi yimsü dak sendakba aser charity trust nem mejangjaba nisungtemi agütsüba tenla nung saru magitsü atema benoka lir. Bill tasenba ya tang aliba bill tongmelang agi angatettsü atema lir. Iba bill nung sorkari non-profit organisations (NPOs) dang yimsü dak sendakba trusts nem mejangjaba nisungtemi agütsüba tenla nungi saru magitsü shia lir. Ajisüaka yimsü dak sendakba trust-i hospitals aser shisaliok rejutem nung amshiba senotsü nungbo saru agitsü akok, ta bill nung shia lir.

SB

I

State Bank of India

STRESSED ASSETS RECOVERY BRANCH, Jorhat

Na-Ali, M G Road, Jorhat, Opp. ASEB Building, PIN-785001 (Assam)

Tel No : 0376-2300193 / 2300204

[Rule - 8(1)]

KIOJEN AGIBA NOTICE

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules 2002 nung Rule 3 kübok section 13(12) nung agüja aliba tashi amshia tsünglanglen sign süa alir, State Bank of India nung Authorised officer-i **08.04.2025** anogo nung Demand Notice ka ajanga sen apur Shri Vikiho/ M/s Multipurpose Hills Valley dang notice agütsüba anogo nungi tenzüka anogo 60 tsünga notice nung shia aliba sentsüh **Rs. 2,98,37,369.00 (Rupees Two Crore Ninety Eight Lakh Thirty Seven Thousand Three Hundred Sixty Nine only)** aser 07.04.2025 anogo nungi tenzüka sen tetemlok agüjang, ta metetdakja liasü. Sen apurtemi sentsühji magütsütet, anungji sen apurtem/Guarantor/ senmangertem aser public dang ya sangdonger, tsünglanglen sign süa aliri iba Act nung Section 13(4) aser Rule 8 nung pa/la nem agüja aliba tashi amshia **2025 küm August 4 anogo** nung tsüngalanglen shia aliba kiojen agiadokogo ta sangdonger. Talisa Sen apurtem/Guarantor/senmangertem aser public dang iba kiojen dak sendakba nung kecha inyaksangshi masütsü tekümdangtsü metetdaksür, mesüra State Bank of India nem **Rs. 2,98,37,369.00** den külemi 07.04.2025 anogo nungi sen tetemlok aser costs etc agütsütsüsa akümtsü. **Iba Act nung section 13 kübok sub-section (8) nung ajemdaker sen apur dang mapang shidak nung item kiojen alangzüksü metetdaksür.**

Part - I

(Belenshitetba kiojen)

Village- Nekhekhu, Nuiland Nagaland nung M/S Multipurpose Hills Valley indang machinery, equipment, current assets including but not limited to stocks & receivable

Part-II

(Bank dang mortgage asüba kiojen)

Block: Purana Bazar (P.K), Mouza No 03, Opposite to Purana Bazar Market, Dimapur, Nagaland nung Dag No 198/1702 Patta No 380 nung tasazük 00B-01K-05Ls kimong:- North tsütsülen: DMC Market lir, South tsütsülen: Pentecostal Church lir, East tsütsülen : Mr. B. Kachari'er kimong aser West tsütsülen: NH-29

Date: 04.08.2025

Place: Dimapur

(AUTHORISED OFFICER)

(STATE BANK OF INDIA, SARB JORHAT BRANCH)



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 09, 2025

AlimaLisopurtemAnogo

Tanü ya alima lisopurtem anogo lir. Aji oda, asenok yimtak yimtsüung nung asünungbo yimkümertem anogomung asütsüba anogo ka lir. Ashiko, asenok aika asoshi lisopur ta asüba ojang ya tasen asütsüa akok, kechiyong asenok asoshibo senso ta asübajiang tangatetba asütsü. Ajisüaka, senso o yimkümer na ya balala, kechiyong yimtak alir ajak senso asütsüa akok saka ajakbo yimkümer masü. Aji oda, yimkümertemi timtem jenti agia ali tazü yateta yim akümyong, parnok sülen arurtembo ayongayonga yangji kiojen yanglua libaliru tenzüktet. Atangji, yimkümer kisüing agi yimti tulu mekümtet, anungji tamalen purtemi yim yatet aser tesülen purtemi tangaria nükentsübutüsüa yimti tulu küma renlokdahtsü ta tamapur mesüra tesüpur kecha mali, ajak kasasa senso kümer kati ka akümtsübutepa liteper. Ajisüaka, tanü alima nung lisopurtem mesüra yimkümertem anogomung amongtsüsa anogo ka shimtetbaji, tanü alima aika nung tesü arurtemi lisopurtem amokbanga yur ola madokdahtsüba taküm tia reprangteta United Nations sabang nungi lisopurtemji mezüingmeshii mesüi parnoka parnok temeten, ali madak süli, sobaliba aser yimten nung süli, yimkümer jenjangji mesamadaktsüi akümtsübutua amshitsü asoshi ajungshir. Aji oda, UN ajanga alima kintem nem angatetdahtsünübaji, alima tesem koba nung südirsüaka mezüing arem lepboka tetsüing ajemoka ali tenzükertemi lisopurtem lir, anungji parnok temetenji wazüka yutsütsüla. Ajisüaka, tia majung kaji lisopurtemji shisa tenük lapoka nüchi maküm alidang, tanga len nungi tashitemetertem arua parnokji amoksepdaktsür, anungji lialiabo mapang tatsüka tsüingda lisopurtem dang nungibo tesü arur bendangertemang takarba aser nütsünga teimba kümadoker, anungji lisopurtemang kilir aser tesü arur bendangertemang kibur ta ser aliba linük aika kümadokogo. Aji oda, tanüa alima nung linük 90 tashi nung lisopurtem nütsüing million 476 shi lir ta asadangteter aser ibaji alima nütsüing yongsük noklang nung shilem 6 dang lir saka alima nung sensakertem rongnung lisopurtemji noklang nung shilem 15 lir ta sükdangteter. Atangji, lisopurtemji tashitemetet nung ano main, rongsen maka aser nütsünga ishika dang lir, saka parnok akaba rongsen aser senmang tulutibaji hon aser taribi masü saka parnoki jembiba oshi aser parnoki benshiba sobalibatam lir. Aji oda, alima nung nisungtemi jembiba oshi 7000 shi nungi lisopurtemi jembiba oshisa teimba aser parnoki benshiba sobalibatamji 5000 dak tali lir. Asenoki itemji bilemdangra, nütsüingbo ishinba asütsüa akok, tashitemetet nunga anosa nüchi maküm asütsüa akok aser rongsen makatsüa akok, saka alima nung lisopurtem ket nung oshi teimba lir aser alima meimchir lipok otsü aser sobaliba meteta benshitembo lisopurtem dang lir, ibayongji UN sabang nung alima lisopurtem oshi aser sobaliba jenjangji mesamadaktsüi wazüka ayutsü nüngdakba indang kanga süoki ia jembir. Ibayongji, 1994 küm nungi küm shia August 9 anogo ya Alima Lisopurtem Anogomung amunger. Taküm iba anogomung atema UN-i shimtetba omenji "Indigenous Peoples and AI: Defending Rights, Shaping Futures." Tetezü, tanü Artificial Intelligence putu nung lisopurtem temeten koda kümzüka yutsütsü aser ano parnok tarutsü mapangjia komaka junga yanglutsütsü ta bilema shisadangtsü asoshi shimtetba omen ka lir. Atangji, tanübo nisungi kechi ashir ta masü saka nisungi yanglutetba Artificial intelligence (AI)-i kechi ashir ta asüba putu lir. Aji oda, nisungi metetnüba aser aginüba ajak tesayur aser tsüraburtem dang asüingdangba putu masü saka AI dang asüingdangba putu lir. Iba ama mapang nung lisopurtem temeten kümzüka yutsütsü tangatetba melira, lisopurtem otsü aser temeten makai akümtsü. Ibaji angateta, tanü AI putu nung AI-i dena lisopurtem temeten aser senmang akümtsübutua amshitsüsa, AI yanglurtem dak temetetba aser tangatetba alitsüabajji kanga tongtibang asütsü. Tanü ya asenoki lisopur anogomung sentong balaka ayongzüka melitetaka, asenok lisopurtemi lisopurtem temeten aser teinyaktsü khuret indang shisadanga amongtsüabajja kanga tongtibang asütsü.

OLEMSABANG OSHI RAKSABA KULI

P.Renthy Jamir.

(Yashi adok nungi...)

Kumong:-Jangbong ta lir, tai kumong süra parapara ataker züing mersü aonsotsü enoka ayur. Alui aodang chisa-a bener aor. Jangbong süra tapu ana tsüingtep tsüingtepa ataker jang aika enoka ayur.

Küla:- Au agi yangluba yibong ta lir, tai küla ya süngo tu agi yanglur ayong nung tzü tenzüka ajemer amchi agi küla yanglur külemkijar.

Lenrü:- Lenmang balalai ao, tai lenrü tetezü lenmang tezülen lenkübok lenrüleni ai lenjem balalai ao terü balalai senshi, terü.

Lia:- Tatsüka or anasatepa, tai lia tetezü talang nung oagi.

Liok:- aniok anir aru, tai liok tetezü tetsüingda kata masü kata masü aluia mao kidanga kecha meinyak liok nung kazüa amung.

Loklalokshi:- Tenük telen arakzüba, khenyongi tai ajak kata manüing süma par kibong nung talir ajak loklalokshia ao rema süma.

Madakkodak:- Lendong aketba inyakyim tai ya tetsür tzüdak o dak mamung prangprang ta ayima ayima jembiba tsür dang ajar.

Maikoi:- Tobur majung inyakyim, tai iba tetezü mazümalem mazü mabong pi den balaka tereprangtsü alakteta.

Masenkosen:- Tasen dang bushiba tai masenkosen tetezü aginüa sapua masü senaroa masü pai ozü chirbo masenkosena benshir.

Mosem:- Molok anung dang tilaba, tai mosemji anung dang ajar anung ataker ta masü mosem ataker ta jembir ano kodang jendang mosem nung tsük tuoka yudir tsük anung ka ta jembir.

Moyar:- Ajak dang tajungtiba moya süpong, tai yangi moya tetezü Sema nunger sü tepong tulu nüngja ana lir. Mersüpong moyasüpong aser aji moya süpong tuluba Moyar dang aliba sü tepong.

Nangpong:- Tebur khonang atemba, tai Aor tetsür chanu dang tenu narola ta ajar tebur chanu dang tebo nangpong ta ajar par chir par jabaso par nangpong.

Nanu:- Tia tajung khenyongi tai, iba tetezü tsükchir den raraba khenbo koker tanaben asentenshir nübu tali aruba makokba dang nanu metitet ta jembir.

Nokchinokzü:- Ken O timlen mashilen angateta jembiba. Iba ya dictionary tetezü Nok timlen nok mashilen techiralen mechiralen.

Nülanüshia:- O lephsia jembiba, tai taluposa aika moatsü dangbo shi nülanüshia achir.

Paktem:- alurodang paktilema ayuba tai, ya pakti atema jembiba O masü putupur küm tatem nung yim sentsüh züingtepa ano yim temzüing yanglushia (Budget session) amenba.

Puje:- Kidong asem, tai puje tetezü kidong tebou semchir (asem ta masü) Aeri puje anem ta jembir, yim ka nung kidong ka den dang anemba.

Pukpa:- Tetama tejashi, tai pukpa tetezü tasü mait tebur tasü maiter tangar maoksatsü ajak nung aoksar pukpapoklem tanur O tebuttsü yutsür ajener.

Purapitet:- Mapa tasen apitet ya Aeri-i kodanga yamala ojang jembia maru, pura ya verb, pitet ya verb. Ao oshi nung pura tetezü tiazü tali tebura ta bangpet jembir, pitet ya Aeri-i koterang mertsüing alulem agi mapa inyakba dang ang ajar. Lenmang pitet alu pitet ta-ang jembir puratet tasüra tiazü ka bilemteta ashiba ano yangji pi ya mamshitsü. Iba O ya tanü asüing lanur kari tetezü maka jembiba ojang lir.

Sasüanem:- Anema aliba kaaita aliba tai ya tetsüingda mapang mapa ka temer ano ka metenzük khen ayonga aliba.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Portland nung PDX Crusade nung nisung 3200-i Khrista agizük



August 2-3 anogotem nung Moda Center, Portland nung PDX Crusade sentong agidang tangokba noksa nung angur.

August 08, 2025: Portland, Oregon nung ayongzüka agiba evangelistic sentong ka nung nisung 3,200 dak temai Khrista agizük.

Athey Creek Church-i ayongzüka PDX Crusade nungji nisung 35,000 dak tali aden aser nisung 3,200 dak temai Khrista agizüka taküm bendanga agütsü.

Arogoi sangdong ka ajanga, "PDX Crusade 2025 ya taküm melenshiba hopta ka liasü. Nisung aikati Khrista ajuruogo aser yimti tesem ajaklen Yisu tenüng ulutsüogo," ta metetdaksü.

Portland nung mapang shia iba ama outreach sentongtem agir, ajisüaka tesüiba küm 25 tsüngda agiba sentongtem rongnung iba sentong ya balaka liasü. Portland aser temeket nung nisung aikati Tsüngrem O atema tzüraa liasü, ta Arogoi metetdaksü.

August 2-3 anogotem nung Moda Center nung agiba sentong nungji Khrista osangtajung kentenertem- Chris Tomlin, Zach Williams, Cain, Taya, Anne Wilson aser Kari Jobe & Cody Carnes nungeria shilem agia liasü.

Pastor Brett Meador-i sayutsüngiba mapang nung pa sülen ojang tulu agi "Tammang nungi Tesangwa dangi" ta zülur liasü. Pastor Brett-i, "Tammang agi asenok meketbanga aliba jila ka nung asenok alir. Na yangi alir süra, iba jila nung alirtemi Yisu Khrista nüngdakba aser teimla bushibaji nai meteta alitsü. Asen jila, yimti aser linük tammang nungi adoka tesangwa dangi meyipbaji asenoki angutsü nüngdak," ta ashi.

Lai O nung ajemdaker pai, "Nisung kari danga tebang agi nangzükra aser temelungjang ajak agi Kibuba Yisu Khrista dak amangra na kümzüksü, ta Laishibai asenok dang ashir. Nü temenen atoktsü. Nü takümji tetemsü asütsü mesüra na jangratema alitsü ta ashir masü, ajisüaka Khrista dak nungi dang anguba tesünep nü dak alitsü," ta ashi.

Nisung meyrjang aika sabang tejakleni arua Khrista nem taküm bendanga agütsüba

sülen pa leniba nung sarasadema liasü.

Pastor Brett-i pa sülen anidaka lokti nem yamai sarasademdaksü, "Kodak nung aliba Oba Tsüngrem, ni menenpur ka ta ni nangzük. Ni tammang toktsür Nü tesangwa dangi meyipner. Ni Nü ajaso chir Yisu Khrista dak amanger. Kü menen atema Pa Kangki nung asü, Pa tasü nungi shia aru aser kü dang tai atok ta ni amanger. Nü den jajatsü atema ni yariang. Ni kümzükba atema Nü dang pelar, Yisu Khrista tenüng nung sarasademer. Amen."

PDX Crusade dak sendakba nung sentong ayongzükertemi, "Tsüngremi ajungba atema onok pelar. Nisung aikati Khrista nem taküm bendanga agütsüba atema pelar. Asen yimti nung Kibubai mapa inyakba nung nenoki shilem agiba atema pelar," ta metetdaksü.

"Anungji nisung kar Khrista nung lira paji tasen poktetba. Tejenba süiogo, ajiang ajak tasen kümogo. 2 Korint 5:17. Sentsüwangshi ajak Tsüngrem meyong süang," ta PDX Crusade Instagram ajanga metetdaksü.

PDX Crusade nung lanurtem aikati Khrista agizükba atema tsüraburtema aikati pelaba lemsatepogo.

Tsürabur kati Instagram ajanga, "Sentsüwangshi ajak Chuba Yisu nem agütsür. Kibuba matsüngdangi oa taküm bendanga agütsürtem rongnung ozü jabaso-a densema liasü. Tatem makai pelar," ta metetdaksü.

Ano aiür chanu kati, "Taonung ni kümzükogo aser ni telemetba agibatem rongnung iba ya tajungtiba lir," ta lemsatep. Ibaji langzüa tetsüi, "Ya ozü jala! Ni na meimer Maemae! Na junga intetba atema ojala kanga nüma atanger," ta metetdaksü.

Arogo aser outreach team-i jelia iba sentong atema renema liasü. Iba sentong nung Khrista nem taküm bendanga agütsürtem nem Laishiba kaka agütsü.

Outreach team nung züngsem kati social media ajanga, "Khrista agizükertem ajak nem tasüngdangba aika keta aliba kaket agütsüogo. Ibaji parnok local Arogotem nung züngokdaksüba maparen nung yaritsü atema lir," ta metetdaksü.

ANOGO ABEN TSÜNGREM DEN

Senti Senmang
T.Ken 147: 12-20

Tejen Lai iba maongka Israel nunger nem agüja liasü. Iba indang ken züluri T.Ken 147: 12-20 nung ashir. Pai Yihuda Tsüngremi parnok asoshi inyakba asoshi Pa tenüng asangtsüla ta ashi. "Kechiyong Pai ne süngküm tartangtsü, tashi itdaktsü. Pai ne chirtem ne dak moatsü" (t.13). Pai parnok artsü nung yimjung agütsü. Pai parnok mesü. Pai parnok nem Pa O aser ozüng agütsü. Pai parnok nem alinük agütsü. "Kin kecha dang Pai yamaji meinyak: aser Pa O bendangba indang, parnoki itemji metet. Nenoki Kibuba sangang" (t.20). Tsüngremi Israel nunger nem Pa senti O agütsü.


Ken züluri Tsüngrem O indang kechi ashir? Tekong 15 nung Tsüngrem ta ashir: "Alima madak Pa temelaba yoker; Pa O kanga karaa aor" (t.15). Kodang Tsüngremi jembir Pai jembiba O Pa nükjidong atalokdaksütsü asoshi tekara osang abener ka ama aor. Tsüngremi Pa O agi alimaji azüoker. Pai ozüng agütsür aser mapatem ataloker.

Tsüngrem Oi temerang oset yimsaa odaktsür. "Pai ozüng agütsür, aser parnok yimsadaktsür" (t.18). Tsüngrem Oi temulungjang temokong aser temerang yimsadaktsür. Nai tamakoktsü tia kar ajurur asü? Tsüngrem Oi tartangtsü ajak raksatsütsü aser ne nem kechi lapoktsütsü.

Tatempa, Tsüngrem Oi moatsür. "Pai pei O Yakob ang ... parnoki itemji memetet. Nenoki Kibuba sangang" (t.19,20). Tsüngrem Oji züngang. Ibai rongsen tulu lir, kodang ne taküm nung rizüngdir tejang atanger.

Tsüngrem O kara aor aser nükjidong ataloker. Iba yagi yimsadaktsür aser leman lapoktsür. Aser iba yagi tagizüker ajak moatsür, iba tashi angang aser amangang. Tsüngremi anogo shia Pa O agizükdaksünür. Nai ne taküm nung Pa O rizünger asü?

Arogo Centenary nüngtem nung Elvis Presley indang Laishiba saya



August 08, 2025: Tan hopta Suffolk nung aliba Needham Market Evangelical Church-i Arogo küm 100 ajungba Centenary nüngtem nung nüngtugu kentener, asür Elvis Presley indang Laishiba saya; Laishiba denji külemi pai teka agi züluba shidi kar densema liasü.

Elvis Presley indang Laishiba nungji hon sentsü agi 'Elvis Presley' ta ajenloka lir aser Laishiba telung nungji tapak aika nung 'bookmark' lir. Iba dak alia Lai tekong aika nung pai asü-a

Elvos Presley indang Laishiba noksa nung angur

lir aser item Lai tekongtem ajanga Elvis den jembi südi, ta bilemer.

Presley-i kolom agi asü-a aliba Lai tekongtem rongnung Yob 31:24-26 densema lir. Iba Lai nung yamai shia lir- "Ni honji kü teimla ngudakja lira, aser hon temeja dang, Ni nü dak temelung alemer, ta danga shia lira; Kü rongsen ulu nung, Aser kü ket agi aika bena aru nung ni pelaa lira. Ni anü apudang, Mesüra ita jangjaa ayadang aji ngua."

Arogoi Hokolbar tashi agiba

exhibition nungji London nung aliba Museum of the Book nungi khen amshitsü atema meshizükba Laishiba tejen aika densema liasü. Item Laishiba rongnung Aso 16 buba mapang aliba "Chained Bible", John Bunyan indang Laishiba aser Yihuda nunger temeshi kakat indang "Torah scroll" densema lir.

Arogo nung pastor, Gary Stevens-i, "Exhibition nung Elvis Presley indang Laishiba-a densemba agi ni kanga pelar. Asenoki Suffolk nung item ama Laishibaji mengutettsü. Iba dak alia Elvis-i teka agi züluba shiditem ngutetba ya jangratemtsüka lir," ta metetdaksü.

1957 küm Khristmas mapang nung Elvis Presley'er kinünger kibong kati pa nem Laishibaji sempet agüja liasü.

Pastor Stevens-i, "Nisung aikati Elvis ya nisung tamajung ka ama bilem, ajisüaka pa Khristan kibong tajung ka nung

aniteta liasü aser pa Tsüngrem den tesendaktep kanga junga liasü," ta metetdaksü.

Pastor-isa, "Ano jangratemtsü kaji, Elvis-i Rock 'n' Roll atema Grammy award kata mangu ajisüaka pai atenba osangtajung kentem atema pai award asem ngua liasü. Pa ya King of Rock n Roll dang masü saka 'King of gospel'-a liasü, ta asenoki ashitsü akok," ta metetdaksü.

Arogoi exhibition ji anogo shia nikongdang 2:00 ako nungi 5:00 ako tashi lapoka liasü. Iba exhibition nung Laishiba aser akhi nüngo oset 23 shi sayaba ajanga Tsüngrem dak mamangertema aika puaa liasü, ta pastor-i metetdaksü.

"East Anglia aser London nungia Elvis meimertem kar Tenla kidangi aruogo," ta pai metetdaksü.

Arogo küm 100 ajungba sentongji Honibar nikongdang 4:00 ako nung agitsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tesemtesem

(adj) tesem balala , yangi aser oagi (different places, here and there)

* Tanü asüng tesemtesem nung menoknok anoker.

Tesen

(adj) tejep tejep (bunch)

* Tsükmenatsü tesen ana agi seret ka atur.

OLONG PAITEP # 7234

1			2			3		4		5
							6			
7										
					8		9			10
		11								
12										
						13				
14										
15						16				

TIPLÉN

1. Zülua aliba metetsü merang - (5)
3. Senyur - (5)
6. Meji - (4)
7. Temaitsü - (5)
9. T ____ maka - (4)
11. Tanidaker - (7)
12. Tekong sobutsü - (4)
13. Naro ka - (5)
14. Ibai - (4)
15. Nashi chiyimdak - (5)
16. Magima - (5)

LANGTSÜNGLEN

1. Tetsür tsüngda jatepba - (7)
2. Tai inyakogo ta metetdaksü - (7)
4. Temenen - (6)
5. Taleptsü yin - (3)
8. O jembiba yimya - (3)
9. Anü alulen - (7)
10. Shibang - (7)
11. Tajatsü tim - (6)
14. A ____ ten - (3)

OLONG PAITEP # 7233 TELANGZÜBA

TIPLÉN :

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA



Akong yagi tejakleni jaja-a aotsübo akoker saka tzü awa-a tejakleni aotsübo makok. Akongi teti langtsüngleni dang tzü awaa aoba angutsü !

Golaghat police-i Gelabil ken o nung nisung 10buba apu

Guwahati, Luroi/August 8 (Agencies): Golaghat police-i Barpathar Police Station moral policing ken o nung Hokolbarnü nisung 10buba puogo.

Ken o ya Assam, Golaghat district kübok Gelabil tesem nung iba ita tetenzüklen lanur ana züka merenshiba dak sendaka lir.

"Tanü Golaghat Police-i Barpathar PS moral policing ken o nung aija alir 10buba puogo. Temzüng ozüng dak ajemdaker onoki maneni jenjang tapet agitsü," ta Golaghat Police-i Hokolbarnü X ajanga metetdaksü.

August 1 nü political party kar nung sendaka aliba nisungtem densema nisung telok kati Gelabil nung lanur ana ki semdangba sülen iba

lendon ya ataloka liasü.

Item nisungtem yagi lanur ana ya kidang nungi tashiyim agi anizüker züka merenshia liasü. Item nisungtem yagisa lanur ana dak ya yirur alidak metsü aser mersü tzü inokja merenshi aser tatalokba ajunga ya camera nung mangaoka ayu.

Lanur ana dak züka merenshiba video ya ayimsünga prokshiba sülen yimden yimsüsürtem, human rights teloktem aser kaketshir lokti tentet balalai iba tatalokba ya aija liasü.

Chief Minister Himanta Biswa Sarma aser Sarupathar MLA Biswajit Phukan natia aibelen a alir anema takaratiba nung jenjang tapet agitsü ayongzüka liasü.

Iba tatalokba sülen anogo

ishika tsüngda nisung ishika puogo.

Police-i ashiba agi, lanur ana anema kuli tain benokba sülen tena ya züka merenshi. Tena ya auyaba aser lokti libaren anema inyaksangshiba atema aija liasü.

Item nisungtem yagi temzüng ozüng dak ajemdaker ken o kecha bushisüngdang mesüi mesüra tashishiba magütsüi parnok sasa iba ken o bentettsü meranga liasü.

Ken o dak sendakba nung mongintemi ashiba agi, temzüng ozüng dak ajemdaker jenjang tapet magira iba amala tatalokba ya maneni atalokyonga aotsü. Ajisüaka Golaghat Police-i ochi obendang agütsütsü tenangzüka agütsüogo.

MP Bimol Akoijam-i centre sorkar aitsü



sentokba sayur.

Budget lemsüktsüba aser talisa rehabilitation atema sen crore 500 lemsüktsüba dak sendakba nung Akoijam-i ashiba agi, mepetmesü tulu adoker aliba mapang sen paika ya dang lemsüktsüba ya taksüka lir, kechiyong nisung 60,000 ki maka kümogo, ki meyrejang aika raksatsüogo aser nüburtem libaliro kanga mejungi kongshiogo, ta pai ashi.

Pai, iba telangzüba agütsüba ya komo nung metzü intoktsüba amaka dang lir ta shia, rongsenketzüng asüngsashi atema küm ter shi income tax magütsüba amala tongtibang jenjang kar agitsü ayongzüka liasü.

Akoijam-i ashiba agi, iba bill benokba mapang pa mesüra Manipur nung lenir shinga dena sensak masem. Paisa, MLA aser MP tem sentoka toktsüba ajanga state ajunga ola maka kümdaksür aser iba ajanga Centre sorkari khuret shitak mabenba sayur, ta ashi.

Imphal, Luroi/August 8 (Agencies): Inner Manipur Congress MP Bimol Akoijam-i, Manipur GST (Amendment) Bill aser Appropriation Bill, 2025 sensak mesemi agizüktsü telemtetba agiba atema Lok Sabha aitsüogo.

Paisa, sensaksem makaba ya tia maka ta ashiba den Manipur maneni rongsenketzüng jenjang kanga mejungi lir aser iba ya yanglushitsü atema küm aika agitsü, ta ashi.

Akoijam-i centre sorkar dang temzüng ozüng dak ajemdaker inyaksangshitsü mepeshiba den parnoki Manipur nung party

lenir aser MLA tem den ken o ashishitep mashishitep aji asüngdanga liasü.

Pai, "Manipur ya vassal state ka masü saka Union nung constituent state ka lir," ta ashi.

Opposition-i Manipur atema kecha balakabo süoki ia bilema mali ta Finance Minister-i ashiba telangzüba agüja Akoijam-i ashiba agi, iba amala telangzüba ajanga Manipur rongsenketzüng jenjang tamajungba kümdaksür. Pai ashiba agi, sensaksem junga makai budget aritepa benokyonga aoba ajanga Centre sorkari state nung mepetmesü adoker aliba

NE nung terenlok maparen atema NEC-i sen cr 11.31 agütsü

Guwahati, Luroi/August 8 (Agencies): North Eastern Council (NEC)-i Brehostibarnü sangdong ka ajanga ashiba agi, parnoki Sikkim densema Northeast nung terenlok maparen balala atema central and regional agency balala nem 2025 küm July ita sen crore 11.31 agütsüogo.

NEC-i ashiba agi, senotsü ya aluyimba, tourism, health infrastructure, human resource development, aser sobaliba wazüka ayutsüba densema sector balala nung terenlok atema agütsüogo.

Senotsü lemsütsüba tongtibang lenlatem rongnung kiwi lu ayimsü atema sen crore 2.09 aser NE nung au ayoktsü atema tsünütsü ajungkettsü asoshi sen crore 1.81



agütsüogo.

NEC-isa, Assam, Manipur, aser Meghalaya nung food processing unit tem amenoktsü atema crore 1.28 lemsüktsüogo. Parnokisa, banana tissue culture facility atema sen crore 1.18, aser Sixth Schedule tesem nung tekübokba jenjang nung aliba tetsürtem nem life skills education agüja parnok nem tashi agütsütsü atema sen lakh 94 agütsüogo.

Iba den bendenloksema council-i, tsüngya atemtsü

atema sen lakh 80 aser Kokborok oshi aser kenozülü wazüka ayutsü atema lakh 83.75 agütsüba densema lir. Kozü aser turmeric tsünütsü atema sen lakh 74.85 aser avocado, persimmon, aser blueberry tsünütsü atema sen lakh 49.90 agütsüogo.

NEC-isa, stabilized interlocking block-making enterprises nongittsü atema sen lakh 94.03 aser merit scholarship scheme atema sen lakh 17.58 agütsüogo.

GOVERNMENT OF NAGALAND
DIRECTORATE OF SCHOOL EDUCATION
KOHIMA : NAGALAND
NOTIFICATION

NO. ED/EST-1/SET-RECRUITMENT/2025

Kohima, dated the August 2025

In compliance with the Hon'ble Supreme Court Order dated 07.03.2025 in W.P.(C) No. 132 of 2016 and W.P.(C) No. 876 of 2017, applications are hereby invited from the contractual Special Education Teachers currently employed under Samagra Shikshafor the purpose of screening.

A. Requisite Qualifications:

1. Registration Certificate of Rehabilitation of India (RCI)
And

2 a) Graduate with B.Ed. (Special Education)
OR

b) B.Ed. (General) with one year Diploma in Special Education.
OR

c) B.Ed. (General) with two year Diploma in Special Education.
OR

d) B.Ed. (General) with Post Graduate Professional Diploma in Special Education (PGPC)
OR

e) B.Ed. Special Education and Post Graduate Professional Certificate in Special Education (PGPC)
OR

f) PG Diploma in Special Education (Mental Retardation)
OR

g) PG Diploma in Special Education (Multiple Disability: Physical & Neurological)
OR

h) PG Diploma in Special Education (Locomotor Impairment and Cerebral Palsy)
OR

i) Secondary level Teacher Training Course in Visual Impairment.
OR

j) Senior Diploma in Teaching the Deaf
OR

k) BA B.Ed. in Visual Impairment
OR

l) Any other equivalent qualification approved by RCI

B. Documents to be submitted:

a) Application in prescribed format (available from the Departments website).

b) Admit Card of HSLC.

c) Mark sheets and Degree certificate of Graduation.

d) Valid Rehabilitation Council of India(RCI) certificate.

e) In case of Persons with Disabilities (PwDs), they shall submit Disability Certificates issued by Competent Medical Authority.

f) No Objection Certificate and Performance Report from the Head of Department (HOD).

g) ST / Indigenous Certificate issued by Competent Authority.

h) 2(Two) recent passport size photograph.

i) Original documents to be presented on the day of Screening cum Selection.

C. General Instructions:

a) Selection process will be through screening in pursuance to the Hon'ble Supreme Court Order dated 07/03/ 2025in W.P.(C)132 of 2016 & 876 of 2017. The decision of the Screening Committee will be final and binding.

b) Applicants are advised to ensure, before applying, that they possess the minimum essential qualification.

c) If on verification at any stage of the examination, it is found that candidates do not fulfill any of the eligibility conditions, their candidature for the post shall be cancelled by the Screening Committee without notice.

d) The selected candidates shall be placed on probation for a period of two years and shall draw a consolidated pay equivalent to the prevailing norms.

e) On selection and appointment, the benefit of pay scale to the erstwhile Contractual Special Education Teacher shall be prospective and not retrospective.

f) In case of any dispute that may occur in the process of selection, the decision of the Screening Committee shall be final.

g) Important Dates :

* Date of publication of notification: 09/08/2025

* Last date for submission of application: 18/08/2025 (till 4:00 PM)

* Shortlisting of eligible candidates to be notified: 20/08/2025

Note :

* Application form may be downloaded from the Department's website:https://education.nagaland.gov.in

* Applications are to be submitted at Room No. 406, Directorate of School Education.

* Interview date for the shortlisted candidates shall be notified at a later date

(SHASHANK PRATAP SINGH) IAS
Principal Director

Israel PM Netanyahu sentong Security Cabinet-i agizükogo

Jerusalem, Luroi/August 08

(Agencies): Israel Ato Kilonser Benjamin Netanyahu-i Gaza City amokbangtsü sentong ka benokba security cabinet-i agizükogo, ta Prime Minister's Office ajanga Hokulbarnü ashi.

"Israel Defense Forces ajanga Gaza City agitsü asoshi renemtsü aser combat zones temalen civilian nem humanitarian aid agütsüba menokdangtsü," ta office ajanga ashi.

"Temelen danga sentongtem benokba ajanga Hamas makoktsü mesüra pua alirtem meyipa anir meshilangtettsü ta cabinet minister tem timbai amanger," ta ashi.

Ajisüaka iba sentong tejangja ano temai madok.

Israel-i Gaza agiloknüa mesüra amokbangnüa mali ta Brehostibarnü ang Netanyahu-i shia lir.

Par linük indang nükjidadong ajak agi Hamas samatsütsü aser transitory government ka nem iba strip amoktsütsü lir, ta pai ashi.

Osangbener den sensaksemba mapang, iba rara tembangba sülen akok tashi tekeraba nung Israel-i Gaza indang security ketdang süner, aser chiyongsü tonnes million ana dak tema Gaza-i yokogo saka lema magütsüi lir, ta ato kilonseri ashi.

"Ozü sentong ya Gaza agiloktsü mesüra amokbangtsü atema masü. Ozü nükjidadong ya Hamas samatsütsü aser pua alirtem anir arutsü aser transitory government ka nem Gaza amoktsütsü lir," ta Netanyahu-i ashi.

"Onoki Gaza ya Palestinian Authority mesüra Hamas nem kodanga magütsütsü. Onoki security ajak agütsütsü. Onoki agütsüba nung security perimeter ka alitsü," ta pai ashi.

"Onoki kanga kera rara tembangner. Ibai yakta tembangtsü. Hamas-i bendanga agüja aser nok-nü yuja aser pua alirtem chiokra, ibai asünga tembangtsü. Gaza nung aliba Palestine nungeria Hamas den rarar," ta Israel Ato Kilonseri ashi.

Ajisüaka mapang tatsüka lir Netanyahu-isa Israel-i Hamas agientsü aser linük security mechi Gaza Strip ajunga Israel-i amokbangtsü tebilemba lir, aser iba sülen Arab governing force ka nem agütsütsü ta ashi.

Gaza nung rara asoshi jembitsü tongtipang cabinet senden ka amentsü lia, Israel-i iba territory nung civilian tem madak yimsü asütsü sentong mali, ta Netanyahu-i nenshia ashi.

"Asen security mechi onoki yangji Hamas indokner, aser

Gaza talenba nungi salar civilian nem yimsü südaktsüner," ta Netanyahu-i ashi.

"Onoki aji maginer. Onoki security perimeter ka aginer, saka onoki yimsü mesüner. Yimsüsür ama onok yangji meliner," ta Netanyahu-i ashi.

Gaza nung Hamas sorkar sülen atema sentong tejangja ka yanglutsü, kong Palestinian Authority shilem kecha malitsü, ta Israel ato kilonseri ashi.

"Onok amokmeren mesüi Gaza nunger nem takum tajung agüja timi yimsü asütsü asoshi Arab forces nem amoktsüner," ta pai ashi.

Gaza nung humanitarian crisis mechi linük balalai par sorkar tali aitsüba mapang ka nung Netanyahu-i iba o ya ashi, kong Israel mitkari tesüiba ita 22 tashi makyonga aruba nung nisung 60,000 dak tema tepsetogo.

Hamas-i October 7, 2023 nü Israel arütsü alema aita nisung 1,200 shi tepseter ano nisung 251 pua bener aoba sülen Israel-i Gaza nung rara ya tenzüük.

Kasa mapang, Israel political-security cabinet ajanga Gaza City agitsü telemtetba agiba ya tai, ta British Ato Kilonser Keir Starmer-i Hokulbarnü ashi aser Israel sorkar dang junga bilemdangtsü ayongzüka liasü.

Nicolas Maduro aputsü atema US-i senpet sen \$50m agütsütsü

Washington, Luroi/August 08 (Agencies):

Venezuela Tir Nicolas Maduro aputsü asoshi osang agütsür nem US-i sempet agütsütsü nangzüka aliba anasü agi tali kumja sen \$50 million agütsütsü sangdongogo, shiba alima nung temesepba mozü shibelener tulutiba rongnung ka ta tai tonglokja lir.

US Tir Donald Trump ya mapang talangka nungi Maduro anemer ka lir, shiba tim masüba mapa jenti inyak ta tai tonglokja aliba election nung takok anguba sülen January ita tir mendeni meyipa shilang. Iba election results ya linük aikati magizük.

US-i senpet sen \$25 million agütsütsü sangdonga aliba anasü agi timba kumtsütsü aser temesepba mozü shibelenba maparen nung Maduro indang-indanga sendaktepa lir, ta Attorney General Pam Bondi-i ashi. Venezuelan Foreign Minister Yvan Gil-i sempet tasenba ya temulung shirangtsüka lir aser ibai "political propaganda" ka ta ashi.

"Shiba nungi iba osang ya aruar onok mesüngmanger," ta Gil-i ashi aser Jeffrey Epstein ken o ketdangsüba mechi nüburtemi aitsüba nung temulung agüja aliba meyipshidaktsütsü meranger ta Bondi aitsü.

Trump indang mezüng kümsük mapang US sorkari Maduro aser Venezuelan ketdangsürtem-i narco-

terrorism, ochimashi aser temesepba mozü shibelenba densema ozüng alema balala inyaker ta tai tonglokja liasü.

Iba mapang Maduro-i Colombian rebel group Farc den külemi cocaine ya hadir ka ama United States süngdaktsütsü asoshi inyaker, ta US Department of Justice ajanga shia liasü.

Brehostibarnü social media X nung video ka lemsatepba nung Maduro-i Tren de Aragua - koba Trump administration-i kiralongrar telok ta sangdonga aliba Venezuelan gang - aser Sinaloa Cartel, Mexico nung amenoka aliba mapa tamajung inyaker network tashi tulu den teka amteper inyaker ta Bondi-i tai tongloksü.

US Drug Enforcement Administration (DEA) ajanga Maduro aser pa den yariteper tem den sendaktepa aliba cocaine tons 30 puogo aser yangji Maduro kisüng den sendaktepa aliba cocaine tons tenet jungnüa lir, ta lai ashi.

Pa temesepba mozü shibelenba nung indang-indanga shilem agia lir ta US-i aitsüba Maduro-i magizüker.

Bondi-i iba o jembiba ya US aser Venezuela sorkar tsüngta mapang talangka nungi mangatettep adoka aruba atsülangshiba lir, saka senpet sen tali agütsüba ajanga par nükjidadong tongtettsü mangdangbo attorney general-i melemsa.

Maduro ya United Socialist Party indang lenir aser pai 2013 küm Hugo Chavez melen aser pai opposition telok tem ajemrepa yutsür aser Venezuela nung pa anemer ola madokdaktsür ta tai tonglokja arur.

Taoba küm mangatettep aliba election sülen longkak aitba nunga pa jenbu aser maneni yimsüsüba mendeni atu.

Saka June ita Hugo Carvajal - taoba mapang Venezuela military intelligence tekolak inyaka alisang - ya Madrid nung apuba sülen temesepba mozü shibelenba ken o balala nung aija Us nung ken o benok.

Carvajal ya aikati kanga tsüboa aliba itdangiter mongin ka liasü, shiba dang El Pollo mesüra The Chicken ta ajar, saka Maduro atsüngdoktsü mechi army dang opposition candidate yaritsü ayongzüka sülen Venezuela yutsür jena ao.

Pai mezüngbo temesepba mozü shibelenba mapa meinyak ta ashi saka mapang tatsüka lir pai aibelenogo ta nangzüka yong Maduro indang miim osang melen temerenshi tajemba agütsütsü asoshi US ketdangsür den tezüngzüktep kar yanglu südi ta nüburtemi jembir.

UK aser EU-ia Maduro'er sorkar anema tenokdangba/temerenshi sangdonga lir.

5buba Inter-Department Badminton asayamung tenzükogo



Dimapur, Luroi/August 8 (TYO): 5buba Inter-Department Badminton asayamung August 8 nü Nagaland Legislative Assembly (NLA) Stadium, Kohima nung tenzükogo.

Inter-Departmental Badminton asayamung lapokba sentong nung Joint Mission Director, Samagra Shiksha Nagaland & President, Directorate of School Education Club, Dr. Kevizakie Rio alakteta jaoker liasü.

Sentong nung o jembiba mapang Rio-i, "All work and no play makes Jack dull" ta asüba nüngtugu oren benoka jembiba department balala tenüng nung iba asayamung nung shilem agirtem dang asaya balala nung shilem agia yakyaka alitsü ajungshi.

Paisa, 2021 küm nungi iba asayamung kanga takok ngua

ayongzüka asayaba atema Inter-Departmental Badminton Club (IDBC) Kohima nem tenüngsang agüja liasü. Paisa, department ketdangsürtem dang, nüburtem tajungtiba nung tenzüktettsü atema human resources takok tashi tajungtiba amshitsü asoshi sendaktepa inyaksü merangtsü ajungshia liasü. Tatem nung pai, asayamung nung shilem agirtem ajaki tajungtiba asayatettsü aser asaya ajak jangaradem asayatsü imlaja ataba lemsatsep.

Sentong nungsa tir o jembiba mapang IDBC tir Er. Vipulhou Lhoungu-i ashiba agi, Inter-Departmental Badminton asayamung ya 2020 küm tenzük. Club tentetba sülen IDBC-i iba asayamung ya ayongzüka asaya arudar.

Iba asayamung ayongzüka asayaba nükjidongji, officer, staff, aser Heads of

Departments (HoDs) ajak longjema kati ka metetteptsü, sensaksem tajung akatsü aser mapa kanga mazüngi inyakba nungi khen anisüngzüksü atema lir.

IDBC tir-i iba asayamung ya officially tenzükja liasü.

Sentong nungsa Elike Shohe-i ken ka aten, Paraciezie Baptist Church, Kohima Pastor Rev. Dr. Kevichalie Metha-i Tsüngrem temaotsü meshizüka sarasadem aser Addl. Secretary to the Government of Nagaland, aser IDBC Vice President Nokchasashi (NCS)-i tepela o jembiba liasü. Asayamung lapokba sentong ya IDBC Finance Secretary Tsutsowe Kupa (NCS) lenisüba nung agia liasü.

Ajak senteper taküm iba asayamung nung department balala nungi team 61-i category balala nung shilem agidar.

Dr T Ao Trophy: Noklak, Mon & Chumo nungeri takok angu



Kohima, Luroi/August 8 (TYO): Indira Gandhi Stadium, Kohima nung tang asaya aliba Dr. T. Ao Trophy 2025 inter-district football tournament nung Hokolbarnü Noklak, Mon aser Chümoukedima nungeri pei tata asaya akok aser Peren aser Kohima na asaya draw nung tembanga liasü.

Mezüngbuba asaya nung Noklak-i goal 3-0 agi Longleng team ayong ayonga koka liasü.

Thangsoi M-i minute 7buba nung Noklak atema mezüngbuba goal idaktsü aser paisa minute 51buba nung

tanabuba goal idaktsü. Asaya nung tasembuba goal ya Lamsong L-i idakja liasü.

Tanabuba asaya nung Mon-i goal 1-0 agi Zunheboti madak takok nguogo. Team ana kanga toktepba asaya aser asaya mezüngbuba shilem nung goal ka danga magütsütet. Iba sülen asaya tanabuba shilem nung minute 56buba nung Laiwang-i free kick ka ajanga goal ka ya idakja liasü.

Hokolbarnü tasembuba asaya nung Chümoukedima-i goal 2-0 agi Dimapur kokogo. Chümoukedima atema minute

18buba nung Lima-i mezüngbuba goal idaktsü aser paisa minute 30buba nung tanabuba goal idakja liasü.

Tatembangbuba asaya nung Peren aser Kohima na goal kaka danga magütsüteti asaya tembanga liasü.

August 9 nü asayatem:

Match 25:

Kiphire vs Wokha @9am

Match 26:

Tuensang vs Niuland @11am

Match 27:

Phek vs Mokochung @1pm

Match 28:

Mon vs Shamator @3pm.

Viktor Axelsen BWF World Championships masayatsü

Luroi/August 8, 2025 (Agencies): Olympic nung gold medal ana ngur aliba asayar Viktor Axelsen-i taruba BWF World Championships nung shilem magitsü telemetba agiogo. Pa yiruba tang anepaluba mapang lir.

Iba asayamung ya August 25 nü nungi tenzükja Paris nung asayatsü aser Denmark nunger nüngtugu badminton asayar yagi pa iba asayamung nung masayatettsüba osang ya Instagram ajanga metetdakja liasü.

Axelsen ya ita asem tejakdang herniated disc ka anepalutsü atema surgery agiba sülen tang tashi badminton asayamungtem nung shilem magi-i arudar.

Axelsen-i ashiba agi, pa Paris nung taruba asayamung nung asayatsüba temang tajungba mekümi lir.

"Kü indang medical team den sensak asemba sülen ni temang anepalutsü atema mapang agütsütsü tetuyuba agüja liasü. Ibayongji tiamaka ni taruba World Championships nung asayatsüba renema matatettsüba kümogo," ta

Axelsen-i Instagram nung zülutsü.

"Asayamung tongtibangtem nung shilem magitetba ya tasa saka ni tezü madanger. Ajsüüaka ni temang kanga junga anepaluba sülen tali tashititba arua asayatsü nükjidong ayur," ta Axelsen-i ashi.

Arishi küm 31 tain Axelsen ya April ita European Championships nung tanabuba round nung tsükba sülen asayamung ka nung danga masayai arudar.

Küm tetenzüklen Axelsen-i New Delhi nung India Open akok, saka All England Open nung mezüngbuba round nung tsükba liasü. Taküm küm tetenzüklen pa top 5 nung liasü, saka tang World rankings nung jenjang 18bubai luogo.

Axelsen-i BWF World Championships ya 2017 aser 2022 küm koka lir, saka pa taoba küm Copenhagen nung iba asayamung asayaba mapang HS Prannoy-i quarter nung tsükdakja liasü.

India nungi iba asayamung nung Lakshya Sen aser HS Prannoy na tebur kija asaya nung asayatsü imlar.

Victoria Mboko-i Canada Open kokogo



Luroi/August 8, 2025 (Agencies): Canada tsür Victoria Mboko-i Hokolbarnü Canadian Open tetsür kija final asaya nung Naomi Osaka koka tang mezüngbuba WTA asayamung ka kokogo. Iba asayamung nung final tonga asayaba mapang lai otsü tasen aika yangluogo.

Arishi küm 18 tain asayar ya Open Era nung asayamung ka nung Grand Slam koker aliba asaya pezü akokba asayartem rongnung Serena Williams sülen asayar tanutsütila kümogo. Serena Williams-i 1999 küm US Open nung Grand Slam koker aliba asaya pezü koka liasü.

Hokolbarnü final asaya nung set ka mekoki aliba nungi meyipa tur Mboko-i 2-6, 6-4, 6-1 agi Japan tsür la ya koka la indang career nung mezüngbuba WTA asayamung ka kokogo.

Lai iba asayamung tanabuba

round nung Australian Open champion Sofia Kenin tsükdaktsü aser round pezübuba nung French Open champion Coco Gauff tsükdakja liasü. Iba sülen lai semifinal nung taoba mapang Wimbledon koker alila Elena Rybakina koka liasü.

Final nunga lai break points teku anguba nungi tibo kokteta hopta tsüngda Grand Slam koker aliba asayar pezübuba koka liasü.

Iba asayamung nung Mboko-i mezüngbuba round nung America tsür Kenin akok aser round of 32 nü Bouzkova koka liasü. Laisa, round of 16 nung mimlai lia Gauff akok aser quarterfinal nung Jessica Bouzas tsükdakja liasü.

Iba sülen lai Rybakina koka final-i ai aser Grand Slam pezü tashi koker alila Osaka madak takok ngua taküm Canada Open tetsür kija asaya kokogo.

BILEMDANGANG
"Tenarong nungji amer atsünungbo tekolaka anidaker."